

○癸卯夜坤方有氣如火光流星出參星下入天苑星下○甲辰憲府啓曰近日諫院所論沿海弊癘事實是病民之痼弊耗國之巨蠹而論執逾月靳閱俞音其有傷於轉圜之盛德已為不細而昨日則又顯示嚴薄之意至以政院之捧入為非是以臺諫之啓視同雜公事矣臺諫袖啓草詣闕則政院安得以不捧乎 聖明於此未免為失言矣臣等竊深惜之臣經世曾於辛亥年間忝按湖節歷遍海上見西邊大洋一帶無尺寸空地從某至某為某勢家所有從某至某為某衙門所占侵徵征稅極其苛細沿海居民蕩失生業常所慨歎故上年入侍之際因忠勲府請復舊征之啓極陳其不可繼論裁省廳 批荅未安之意則 聖明溫批諭之曰此言予果誤發矣臣心感激尚如昨日事想 聖明亦或記之矣自此弊源一開末流彌廣海上棄占之弊日以益滋今則殆與曩時無異豈不為昭代之大累乎使其失此而各衙門不成模樣諸宮家貼於窮乏則 聖上之持難猶之可也今既萬無此理而海隅蒼生舉皆欣欣然動色相慶盡為復土樂業之民不審 聖明何憚而惜此一節遂成一事而三失乎請加深思亟賜允俞 荅曰所論之事雖曰弊癘諸宮所屬非 祖宗朝賜與則乃是 先朝賜給故予不敢一朝還收意非偶然勿為更煩昨日下午政院